

四庫全書

史部

欽定四庫全書

閩中理學淵源考卷七十七

廣平府知府李清馥撰

萬厯以後諸先生學派

按隆萬後吾鄉宿望老成接踵相起惟時學術分離
鄉前輩尤守舊槩界限甚嚴其扶樹世教底柱狂瀾
諸家集中可證也間嘗考當時所推者如黃氏文簡
李氏文節之清脩碩學王氏恭質詹氏咫亭家太常

心湖之謬謬孤忠王氏尹卿楊氏貫齋弟文恪之貞
規實踐蘇氏紫溪何氏鏡山之紹述前脩李氏序齋
郭氏恭定之建白忠懇黃氏毅菴黃氏襄惠之清毅
有執蔡氏清憲林氏文穆之負荷大節外此若蘇石
水之風猷呂天池之守正王慕蓼莊梅谷之砥節楊
日燦劉台巖之家學王三揆朱敬所林甫任陳欲潤
之儒修林省菴之夙望鄭孩如蘇子白莊九微之治
經黃季穀林素菴之講席王忠孝盧若騰何九雲李

光龍紀文疇陳履貞等諸公之志節稽其出處本末
升沉顯晦各成所學所守而流風餘範卓然可以待
質後世據其跡而論其心蓋人物是非必百年論定
一代川嶽英靈之萃亦於是而可徵矣諸公未能備
採爰輯其師友所訂述載於篇其在隆慶間及家學
學派者已於前編詳云

同知鄭孩如先生維嶽

鄭維嶽字申甫別號孩如南安人萬厯丙子經魁銓遂

昌教轉五河知縣立方田法濬淮河督役平均陞曲靖府同知以母老歸養維嶽究心聖學兼通禪理每講經論辨無窮又於天文樂律無不究心有知新錄四書正脈易經密義意言禮記解諸書

閩書

南安邑志

襄惠黃鍾梅先生克瓚

黃克瓚字紹夫號鍾梅晉江人萬厯八年進士授壽春知州擢刑部郎累官山東布政陞巡撫時稅礦病民抗疏極論并劾稅監陳增馬堂不法事嚴治其黨

蝗旱為災復疏發帑賑濟蠲額外稅銀十餘萬陞南
戶部尚書召理京營戎政改刑部受神光兩朝顧命
李選侍移宮克瓚疏論內侍王永福等八人盜案光
宗謂其偏庇李氏怒責之乞休不許天啟元年冬加
太子太保明年復以兵部尚書協理戎政廷議紅丸
克瓚述進藥始末力為辨析持議與爭三案者異政
擊紛起自是創要典者率推附之屢疏移疾加太子
太傅以歸四年魏忠賢盡逐東林召為工部尚書視

事數月與忠賢忤復引疾歸三殿成加太子太師崇
禎初以薦起南吏部尚書尋致仕歸卒諡襄惠著有
數馬集杞憂疏藁百氏繩愆性理集解春秋輯要諸
書按黃之先有為宋學士者崖門之難去妻子於海
門居焉人號沙堤黃氏有山曰梅林山故公別號曰
鍾梅云子道敬戶部員外郎道爵刑部郎中嘗劾巡
撫熊文燦及弁將趙庭貪懦狀黃公道周稱之著有
麗驕亭集姪道瞻有風節道景癸未進士

雍正九年
郡志王

氏志道撰墓志 明史

州守楊日燦先生啟新

楊啟新字日燦晉江人萬曆十七年舉人授海門令左
遷東莞丞量移武宣令遷左州守卒於官啟新循循朴
謹不求人知歷官五載布衣蔬食沒幾無以殮漢史惆
悵無華庶幾近之左人祀之名宦著有易經講義子瞿
峽丁未進士官至江西副使著有易經疑叢栖霞山人
石室藁黃華讀藁二東藁

朱敬所先生一泮

朱一泮字達宗晉江人生而恂遜嚴重和易齒歲稱孤
既數年得其尊甫手書叢籍中悲涕不止感動家人稍
長事母盡孝晚節母氏病風先生晝夜起居不怠志養
無方母歿哀毀過當素髮夕改祭奠之日精潔必芬式
厥禮儀子性孺弟遵而化之先生少受經書邃於春秋
旁通諸經子史厭應舉俗學設帳授徒尊尚誠敬衣冠
危坐靡間寒暑雖屋漏之中了無岸幘跛倚之態康莊

坦達肅恭矩步及至曲巷旁途亦紆轉方正不斜側
取捷跡先生平生非禮之事不接於目近利之行不
邇諸躬從先生學者儼然尊崇雖至白首貴倨猶憚
畏如一日先生之言曰一誠也主一敬也繇敬入誠
四勿是也又曰道正氣也精神私氣也吾儒從事於
道而葆其精神釋氏第葆精神而已其所攝持亦類
於敬遺乎道矣先生以言為塗以行為墮用墮印塗
是以學者稱為敬所先生何氏鏡山曰士之不能盡

於道者豈非馳慢其外貌哉夫耳目手足人所共見也猶不能矜且攝况夫人所不見之心先民有云繇乎中以應乎外制於外以養其中懿哉斯言先生體之矣先生無麻之蓬不滌之芷卓然自會於聖學而實究之躬行惜乎其名僅止於閭巷吾烏乎敢泯先生哉

何鏡山撰本傳

文學林志宏先生甫任

林甫任字志宏其先燕人元末有諱泰者兄弟皆舉進

士為泉州路同知因家泉泰之孫曰觀入明為歸州別駕別駕之孫曰茂森喪妻不娶鄉里多質平焉三傳為甫任之父某以文學為諸生祭酒人稱曰春亭先生甫任幼時動止異凡兒稟學於父父時時稱說古先聖賢有宋諸儒甫任輒欣欣嚮焉弱冠補弟子員以家貧授徒瞿然模範在念繩趨尺步弟子無敢以褻見遂發憤聖賢之學終日危坐讀書不輟寒暑自六經宋儒以及近世薛胡諸先生所著仰思反求內索外驗以求其是

而見諸實踐於是作四面圖纂以自記曰居敬曰立志
曰進學曰遠識而曰敬之一字吾持之最堅白勿弗能
奪矣夜歸則以日所教者跪正春亭公父子間自為淵
源性至孝二親繼沒悲哀慘惻蔬食避內舍者三歲平
生寤寐經籍學問多出自得每念正學精進寡人朋儕
中有虛心願質者後進有質美願學者皆樂與誘掖開
導其誠意既足動人而光霽又易為親故從遊最盛皆
以孝弟忠信為學其言談舉止遇之循然有理者不問

知為甫任弟子也年五十三得疾正冠衾而逝所著有詩經翼傳四書管見易錄禮錄書傳評性理史評及感省集諸編素交友有陳氏欲潤王氏鑄為最善云

何司徒撰

本傳略

遺佚黃季焄先生文照

黃文照字麗甫同安人參政文炳弟學者稱為季焄先生始為諸生數奇遂棄去專性命之學潛心力行自比陳布衣真晟之儔日以談道為事所著有道南一脈孝

經仁誼太極圖理學經緯諸書晚又以易學著隱溫陵
南臺山中嘗出游大江以南至雲間訪陳氏繼儒論業
大相歡契平生至老手不釋卷性好獎士類遇人有片
善必極引重念及朝家宵旰憂勤內外多故疎床敝席
不敢有逸見者皆為之興感嘗東林素菴句云天上有
人調玉燭山中許我坐春臺又云四郊多壘懷司馬一
籌莫展愧仲連蓋憫時念國草茅抱杞憂如此崇禎戊
寅南安倉猝之變走者相望富家巨室不知所為照與

監司峽江曾櫻講學於筍江出片紙開諭之立散人服其德化乙酉年九十歸隱故里輪山之北年九十三卒林氏孕昌曰吾郡有紫陽過化以後學脈火傳至蔡文莊師弟薪而揚之近何司徒倡學於泉山家省菴開講於不二又燈而燃之黃氏季穀司徒同學友也司徒與閩直指李公先後曾薦於朝未及徵昇文筍江二社奉為北斗先生屏嗜寡慾絕識去智以聖賢之書愉其志以朋友之聚飭其躬枯坐一室著述萬卷八十年來有

如一日嘗有取於朱子晚年定論其學以未發為宗其教以躬行為本云

同安邑志

林素菴先生荀堤集

縣令蘇子白先生庚申

蘇庚申字子白天啟元年舉人就教易州負笈從學者甚衆遷連山令潔己愛民卒於官連人醵金護喪歸著有四書翼箋易經管見

雍正九年郡志

藩伯潘士鼎先生洙

潘洙字士鼎晉江人萬厯戊子鄉薦第一聯第進士教

授廬州陞國學博士轉工部主事權杭州南關稅羨金
八千餘悉貯藩庫改吏部歷員外陞郎中時神宗惡吏
部諸臣在官在籍盡逐去留者僅四人洙與焉丁外艱
服除復補吏部念母假歸久之起為江西叅政兼理驛
傳丁內艱服除補浙江參政備兵嘉湖遷廣西按察陞
江西右布政轉廣東左布政卒於官洙涖官所至不妄
取一錢家日窘迫終無改悔愛國之誠至沒不衰弟瀾
字士觀萬厯甲辰進士授戶部主事改兵部歷郎官出

為湖廣參政著有文集 雍正九年郡志

司寇蘇石水先生茂相

蘇茂相字宏家號石水晉江人萬厯二十年進士歷戶部郎典試貴州調守彰德遷河南副使尋督學江西晉南尚寶少卿陞太僕正卿晉僉都御史巡撫浙江請修方正學祠厚恤其家詔從之尋丁艱歸以薦人為趙南星所劾天啟五年起為刑部右侍郎改戶部總督漕運晉尚書七年秋懷宗立改刑部崇禎元年春回籍尋卒

雍正九年郡志

清憲蔡遜菴先生復一

蔡復一字敬夫號遜菴同安人萬歷二十三年進士
弱冠登第疏請歸娶授刑部主事疏劾石星殺平民
冒功狀御訊處死中外憚之歷郎署十七年始遷湖
廣叅政分守湖北進按察使右布政使清介自持以
疾歸光宗立起故官治兵易州尋遷山西左布政使
天啟二年以右副都御史撫治鄖陽歲大旱布衣素

冠自繫於獄遂大雨黔苗為亂貴州巡撫王三善敗
沒進復一兵部右侍郎代之喪亡之餘兵食盡絀斗
米銀八錢復一勞來撫循人心乃定尋代楊述中總
督貴州雲南湖廣軍務兼巡撫貴州賜上方劍便宜
從事復一召集諸將吏申嚴紀律前後督師斬馘無
算復請敕鄰省諸郡犄角平賊上悉可之因命各省
諸鄰郡悉聽復一節制時復一為總督而朱燮元亦
以尚書督四川湖廣陝西諸軍以故復一節制不行

於境外而復一所遣魯欽等深入四川雲南兵皆不
至復一因論事權不專故敗遂自劾罷免聽勘移境
上候代復一仍拮据兵事盡瘁不輟竟卒軍中訃聞
上嘉其忠勤贈兵部尚書諡清憲任一子官復一好
古博學善屬文耿介負大節既歿橐無遺貲有遯菴
全集行於世

明史

雍正九年郡志

藩伯王慕蓼先生畿

王畿字翼邑號慕蓼晉江人早失怙恃家海東倚依

荒郊備嘗困苦塾有書聲壁聽而樂之時輟耕竊讀
古人書積久而心靈功深年幾三十始蔚然黌序間
萬曆二十二年鄉薦第一二十六年成進士授餘干
令不赴改越州教授遷國子博士轉戶部主事督太
倉儲歷吏部出典蜀試遷杭州守濬南湖工竣詔賜
金勞之以治行第一召賜宴光祿命督學浙江擢江
西參政晉觀察使山西右布政道轉浙江左布政時
邊事孔亟兵餉驛騷重以織造之後糜金錢動百萬

計屢被嚴旨督責部推太常卿未下會有劾其餉缺
額者遂引疾乞歸畿平生砥節自勵宦游二十餘載
治行卓然嘗曰國家無輕豢虛餌之爵祿世上無便
宜富貴之聖賢二語自奮論學以洛閩為派近世獨
服膺薛文清蔡文莊而於王陽明衷其曠論文以韓
歐為的近世獨服膺唐應德王道思而於王元美衷
其材故時見之文章議論無非從心性發揮其渠度
可為後學步趨即微嬉詭亦且道存呂氏圖南撰檇

全集序道晚年友於畿最為得力云無日不晤晤輒憂盛危明惻然於臨深履薄之際而勉我者慕蓼先生云所著有櫟全集四書易經解門人施邦曜梓行之當事采譽言特祀瞽宗焉

通志 雍正九年郡志 蔣相國撰墓志

呂天池撰文集序

侍郎呂天池先生圖南

呂圖南字爾搏別號天池晉江人萬曆二十六年進士授中書舍人歷禮部郎擢為御史出按粵西浙江尋謝

病歸天啟初起為南通政使石參議尋遷左通政使時
璫燄方張有監生陸萬齡等請祠璫文廟李映日等請
加九錫封王俱嚴駁不上懷宗賜敕有心事皎然守正
不阿之語加右都御史旋改南京戶部侍郎總督糧儲
會江陵饑軍士聚衆踴諍變且不測遂抗疏乞留漕糧
二十萬石不俟俞旨便宜給發用是削籍歸家食十餘
年築藍水利鄉人賴之歲時閑影齋居跌宕書史如武
榮清溪諸邑志俱與邑侯共脩焉卒年七十有二所著

有壁觀堂文集

新郡志

南安邑志

司業莊九微先生奇顯

莊奇顯字允元晉江人敏之玄孫年十九登萬厯三十四年賢書四十一年進士殿試第二人官至南國子司業三十五而卒著有尚書便覽行世

雍正九年郡志

文穆林實甫先生鉉

林鉉字實甫同安人萬厯四十四年進士殿試第三人授翰林院編修累官祭酒時璫勢甚張頌德建祠

遍天下一日諸生執呈欲立忠賢像於太學請定判
針曰孔聖師也禮有北面之尊魏公功德雖盛臣也
若並列上座他日主上臨雍謁奠君拜於下臣偃於
上於心安乎即稱疾去懷宗即位聞其語嘆曰危行
言順君子也召為禮部侍郎拜東閣大學士卒於官
諡文穆

雍正九年郡志

巡撫曾霖寰先生化龍

魯化龍字大雲號霖寰晉江人萬厯四十七年進士授

臨川令以卓異擢御史崔呈秀惡謝文錦以化龍為所
首舉遂出為寧國同知擒斬太盜陞南戶部員外丁內
艱服除補兵部郎督學廣東衡鑑獨絕所首拔陳學銓
葉著謝宗鎰三人先後俱登解首攝海道篆平海寇劉
香陞廣西參議士民勒石紀績轉江西副使再轉糧儲
道兼巡視漕河擢按察使時有曾鐵面之號後以原銜
督江西糧餉丁外艱服除即家起僉都御史巡撫登萊
移鎮膠州賊衆十餘萬圍膠督兵固守遣降將擊賊大

破之復東昌等二十七州擒偽官二十餘人置法無何
闖賊陷京棄官歸卒於家年六十三著有作求堂集

雍正

九年郡志

宰輔蔣八公先生德璟

蔣德璟字中葆號八公晉江人父光彥江西副使德璟
天啟二年進士選庶常授編修崇禎中歷官少詹事召
對陳練兵練將法甚備又上救荒事宜擢禮部右侍郎
請徹內操核要典禁伐採濫規止黃冠陪祝太學又請

正楊嗣昌聚斂之罪薦侍郎陳子壯顧錫疇祭酒倪元璐等上皆錄用壬午廷推閣臣召對言邊臣須久任上問天變何由弭對拯百姓即弭天變近加邊餉千餘萬練餉七百萬民何以堪又增督撫二總兵六副將數十人權不統一何由制勝上然之首輔周延儒常薦德璟淵博可備顧問文體華瞻宜用之代言遂擢德璟及黃景昉吳甡為禮部尚書兼東閣大學士時延儒甡皆各樹門戶德璟獨鯁直無所比黃道周召用劉宗周免罪

皆其力也開封久被圍自請馳往督戰優詔不允明年
進兵備冊凡九邊十六鎮新舊兵食之數及屯鹽民運
漕糧馬價悉具復進諸邊撫賞冊及御覽簡明冊上深
嘉之諸邊兵馬報戶部者浮兵部者過半耗糧甚多因
條十事以責部臣又因召對言文皇設京衛軍四十萬
內府軍二十八萬又有班軍十六萬春秋入京操演誠
得居重馭輕勢今皆虛冒願脩舊制上不能用甲戌輔
臣請行鈔法德璟力爭得免先以軍儲不足歲給直畿

輔山東河南富戶令買豆米百萬輸天津民大困力陳其害上罷之二月上以賊勢漸逼令羣臣會議奏聞都御史李邦華密疏云輔臣知而不敢言翼日上手其疏問何事陳演以少詹事項煜東宮南遷議對上取視默然德璟從旁力贊上不答給事中光時亨追論練餉之害德璟擬旨向來聚斂小人倡為練餉致民窮禍結悞國良深上不悅詰曰聚斂小人誰也德璟不敢斥嗣昌以故尚書李待問對上曰朕非聚斂但欲用兵耳德璟

曰所練兵馬何在徒增餉耳且新舊練餉戶部雖并為一州縣追比仍是三餉上震怒責以北友德璟力辨諸輔臣為申救尚書倪元璐以鈔餉乃戶部職自引咎上意稍解明日德璟具疏引罪旋罷練餉而德璟竟以三月二日去位給事中汪惟效檢討傅鼎銓等交章乞留不聽德璟聞山西陷未敢行及知廷臣留已即辭朝移寓外城賊至得亡去丙戌九月卒德璟熟前代典章及明朝掌故邊塞漕鹽水利刑律莫不究其利弊文章敏

瞻在詞垣日草二十餘誥勅見者嘆異之

明史 雍正九年郡志

兵備吳竹公先生載鼇

吳載鼇字大車號竹公晉江人性至孝母病衣不解帶
既卒親負土葬於雒江風雨夜歸有神燈翼之天啟五
年成進士逆璫慕其名欲以鼎甲許之不就戊辰入對
以忤權貴謫浙臬幕陞金華司李平反冤獄馬文紹等
九十餘人嘉湖軍旗之亂以片言諭止之後官至兵備
僉事卒於家所著有宙書咫聞十餘種

雍正九年郡志

主事王愧兩先生忠孝

王忠孝字長孺號愧兩惠安人崇禎元年進士授戶部主事時朝議輸通津外儲以實京師忠孝督運大通橋催攢有法日輸三萬石會薊督咨部欲得廉慎明決者與共事部推無如忠孝遂提督薊儲監督內官鄧希詔數以難事相窘欲自置兵設餉索倉耗羨忠孝曰升斗皆官物安得耗羨希詔曰餉司能保無額外徵耶忠孝正色曰吾戴吾頭來豈以頭易升斗哉希詔大愠遂拾

其未兌濕米疏上之旨逮下獄及置對抗辭不撓希詔乃羅織成獄以上部堂薊督皆疏言其冤都察院王志道復力為辨上意稍解得削籍遣戍明年希詔所為不法事露論斬忠孝乃得白歸

雍正九年郡志

掌坊賴宇肩先生垓

賴垓字宇肩德化人崇禎元年進士授平湖令治行為兩浙最召對稱旨擢翰林院檢討歷右春坊以才名著乞歸養親居近二十年卒

雍正九年郡志

侍郎陳龍甫先生洪謐

陳洪謐字龍甫晉江人宋與桂之裔崇禎四年進士授南戶部主事管北新關盡撤關防復兌南糧盡塞出入影耗之竇遷員外擢知蘇州蘇賦幾當天之下半積逋稠疊至即奉削級之命乃下教州縣盡斥諸羨費以充正額終不能逮坐鐫級至盡其聽訟以牒畀訟者令自攝對開誠剖析人皆信服或不欲終訟輒銷牒遣之吳江民變奉檄單車往諭皆羅拜伏罪僅摘為首一人以

報泝賊薄安慶督撫議撤閭門萬家為防禦計洪謐曰賊必無越江陵趨蘇州之理脫有不虞守請任其咎乃止嘗閱舊牘見倡議毀九學書院為庵祠者擬成未遣曰罪有大於此者乎趣具獄論死遇童子試與諸生指授題義語溫溫不啻其父師請囑不行榜發不限額數務盡能文者而止至今吳士語及猶感涕也恒言天下之亂皆吏不恤民所致故守蘇垂十年一以仁恕為政民號陳母又號陳佛所在肖像祀之本緣賦不遷吳人

反以為幸惟恐其去庚辰癸未雙舉卓異第一紀名御
屏召赴闕與清廉宴陞山東按察副使備兵登萊未抵
任晉太僕寺卿推兵部右侍郎歸卒於家年六十九洪
謐學行夙優守蘇循職為一時最與方岳貢齊名晚方
大用而未竟其措施云

雍正九年郡志

給事莊任公先生鼇獻

莊鼇獻字任公晉江人崇禎四年進士授庶吉士改兵
科給事中上太平十二策首在格君心開言路終以折

獄用刑謂秦晉蠢動以中州為淵藪必有跋扈釀亂者
及今不創禍將靡極又謂番甲之設本以緝奸盜非以
網緝紳中使豈有輜畧何故委以監紀重任語多激切
疏入謫浙藩照磨黃公道周贈詩云當年稽首十二策
我遠不及莊任公後歸隱葵山廬父墓側以終著有葵
山文集

雍正九年郡志

主事盧牧洲先生若騰

盧若騰字牧洲同安人崇禎十三年進士御試召對稱

旨授兵部主事時閣臣楊嗣昌督師湖廣作佛事祈福
若騰疏參嗣昌不能討賊止圖佞佛上以新進小臣妄
詆元輔嚴旨切責時論壯之後歸隱海濱卒同時有沈
佺期許吉燦俱癸未進士隱居以終

通志

縣令吳宣伯先生韓起

吳韓起字宣伯晉江人崇禎十三年進士授當塗令有
惠政文詞古雅海內稱為青嶽先生著有四書易經說
雍正九年郡志

行人陳喬嶽先生履貞

陳履貞字喬嶽晉江人崇禎癸未進士授行人司壯歲常遊武夷見考亭祠宇傾圯即捐倡脩葺在安平復新朱子書院朝夕禮之惟謹生平孝友凡期功之貧不自贍者悉衣食之同譜稱貸無吝色亦無德色晚節食貧自適著書課子而外無他興焉

雍正九年郡志

文學紀先生文疇子許國

紀文疇同安人廩生博學有名與子許國並遊黃石齋

先生之門稱高弟著復書史勺等書卒海島許國年二

十二舉壬午鄉薦

同安邑志

孝廉曾弗人先生異撰

曾異撰字弗人晉江人移家侯官少孤事母至孝家窶甚歲飢採薯葉雜糠粃食之妻負畚鋤乾草給爨長史有知其賢欲為地者介然不屑也久為諸生留心經世學詩詭激有奇氣南贛巡撫潘曾紘得王維儉宋史招異撰與徐世溥更定未成而罷崇禎己卯舉於鄉癸未

歸卒著有紉綬堂集

雍正九年郡志

主事林致子先生志遠

林志遠字致子同安人年二十六舉于鄉力學博聞勵志弗衰九上公車癸未始成進士授工部主事假歸奉慈幃結茅清溪仙峰嶺稱陶菴先生著有歷代史白年七十二卒

雍正九年郡志

監丞黃明立先生居中

黃居中字明立晉江人萬厯乙酉舉人博通典籍得未

見書必手自校錄授上海教諭遷南國子監丞僑寓金陵藏書萬卷年八十餘著書不輟人稱海鶴先生子虞稷有才名

國朝康熙己未年以博學宏詞徵

雍正九年郡志

溫陵楊氏家世學派

按隆萬間楊貫齋兄弟以篤學矯脩躋顯仕為時碩彥鏡山先生撰貫齋傳稱理學文章庶幾兼之撰文恪傳稱一代完行名臣蓋二公家學一時推重信有

道之儒也再考公尊人舍山公宦歸而貧其貽謀以
光大其家者厥有自矣今撮先輩論述敘其家學著

于編

布政楊貫齋先生道會

楊道會字惟宗號貫齋晉江人隆慶二年進士初令
黃巖息訟緩徵歷工部郎擢南戶部主事乞省親歸
起補原官丁內艱服闋補工部尋權木南關張居正
授指令伺察不報受督責久之張病六曹堂官皆為

設齋祈福大司空出俸金首事道會謂此臣子事君
父禮某不敢預聞者為道會懼而江陵相自此不起
道會亦未嘗自言出守安慶丁外艱服除知台州黃
巖故台治也將至民襁負道迎不絕倭寇不敢犯境
遷廣西按察副使與巡撫微不合即投檄歸居二年
起為其省提學使者會臬僚多缺悉委署篆兩平徭
亂既成功又仰屋嘆曰徭雖平乎吏墨而刻豪蠹而
侵此亂本也其可勿問尋遷湖廣參政分守荆南道

有香璫久與士大夫為難道會至驚為神人轉布政
右使值楚宗獄起諸司尚日夜治楚獄不休道會語
左使楚宗始事者已坐罪若株連及人人恐生他變
左使乃列上罪狀為數等得旨施行又語楚撫誅戮
之後宜停楚刑一年以示寬楚撫奏上報可道會復
時時嘆曰楚氛之起國戚幾頓牽纏斯長亦因諸公
操之太甚令某在事當不其然亡何轉左自親王而
下皆具禮待之曰大家巨族且厚本支況天潢乎庚

成因入覲乞歸許之其入覲也李文節時為言者所攻
迸居荒廟道會每過從譚至夜分道會為誦白沙詩茫
茫宇宙人無數幾箇男兒是丈夫以壯其志云道會貞
而不諂和而不流生平不齒榮利未嘗一失足權貴人
門嘗言理學盡於性理往鑑備于綱目因取性理精言
採入程朱全書近思錄為性理抄脩史依春秋綱目例
纂成自作論贊有史綱節要又有詩禮二鈔周禮詳節
四書商求等集藏於家弟道恒道賓見蘇阜山學派

南道

源委 新郡志 林素菴續小學 闕書 通志

文恪楊惟彥先生道賓

楊道賓字惟彥晉江人道會從弟萬厯十四年廷試擢
及第第二人授翰林院編修累遷國子祭酒少詹事禮
部侍郎尚書缺攝篆者久之充經筵日講記注起居累
疏乞歸不許奉命有事齋宮禮未成以疾擁還遂沒道
賓為國子祭酒時疏請東宮行齒胄禮表進三國志五
代史論斥閹豎公貨財以古為鑑詞切而直與諸國子

按古射儀行之射圃縣省日之賞以誘勸之以推明高
皇帝建立射圃學宮之意其攝尚書禮部疏陳五事曰
葆清明平旦之氣以澄聖衷曰召閣部大臣入對以決
壅鬱曰復章奏批發之規以尊主權曰慎內批中發之
旨以杜羣疑曰去形跡體面之套以振事功上萬壽節
道賓緣華封三祝之意推而衍之請上勵精圖治所以
為受天之壽祝命東宮諸王出就傳所以為受天之多
男子祝捐爵出祿脩廢官補大僚所以為受天之富祝

每遇進講盥頰焚香端坐待旦入視部務退邸舍作春秋通鑑講章隨事發明借古為喻講讀久輟道賓言太子天下本培養宜厚諭教宜勤宋臣程顥有言與近習處久熟便生褻慢與士大夫處久熟便生敬愛此確論也宜亟渙玉音卜期開講蒙恤諸大臣諡典久闕道賓言國初大臣議祭議葬即與議諡後因請乞紛紜乃令會議類奏今萬厯三十一年以至今日閱五年矣物故大臣其人非一不及此時一為分別將來耆舊不存事

跡湮廢揣摩任意毀譽失真豈國家慎重勵世褒賢之
大典哉宜下臣部以三年或五年為期博採公論酌擬
奏聞著為成規從之道賓起家翰林以至掌部嘗分試
禮闈兩主鄉試一主會試所得皆知名賢士居家孝友
盡誠與人煦溫引己反躬靡有繫吝至乎義所不可事
所當為不肯苟為徇異作箴自警大旨謂貴常可賤富
常可貧須立定根脚我不必是人不必非須剖破藩籬
性命為輕名節為重須審度權度名位非求可得禍患

非避可免當勘破機關箴成遂為絕筆時年五十八耳
當朝士大夫皆曰楊公達生若是立為請贈諡得贈禮
部尚書諡文恪遣使營葬護喪恤終之典恩數獨隆

闕書

舊郡志 新郡志

洛陽劉氏家世學派

按劉公可先生三世樸學古行其仕者皆清德恬節
有名於時而賡台先生尤惓惓家庭訓誡其秉心砥
行欲與古人相上下於時會頽靡之日獨世篤謹厚

風規以為一時坊表故特錄之

少卿劉台巖先生弘寶

劉弘寶字公可號台巖晉江人萬厯十四年進士選翰林院庶吉士授戶科給事中首上疏勸上御經筵召還直言諸臣而糾大璫之橫不法者人以為得大體進工科都給事中察水衡錢數諸令甲所不急一意撙省即中貴人必執誼力爭之時江西困陶型三吳困機杼徐淮上下瀕河困墊溺弘寶請陶型無徵奇巧機杼宜舒

其期河堤亟築亟潰民困版築宜厚其僱直而驅諸罷民佐之責治河大臣折厥衷諸請復故道及請浚七百餘里陸地別通漕皆調甚宜一切報罷他所論奏平反率類是會科臣序遷視資之後先為內外弘寶遜同官自請外補遂出為浙江參政分部台州會有言水被淮泗祖陵者上切責治河大臣部覆波及坐謫潮陽典史以謫籍卒於家後以登極恩贈太常寺少卿弘寶清介仁厚蔬糲終身所居不蔽風雨其端渠正範雖夜分盛

暑必衣冠與人交母問少長惻怛至到望之知為有德君子也嘗手抄薛文清讀書錄躬行一稟之在惠潮時訪李見羅楊復所二公相切劘居常逡巡韜抑不露意氣而遇事必言輒復委婉曲盡事情公卿間尤以此多之於是公望蔚然所著有尚書說諫垣遺藁子廷焜正九年郡志 史文簡先生撰墓志

文學劉賡台先生廷焜

劉廷焜字子曦號賡台台巖之子有名諸生間餽于庠

奉父母至孝友恭于兄弟篤古質慤無一毫流俗之氣
其方嚴勤儉出於天性酷嗜書史矻矻孜孜留心古今
治亂興亡之大機及聖賢學問經濟可以裨身心裨世
務者手記目識無虛日月即之而介久之款款中孚如
金石其臨事祇慎不敢造次其於敬之一字被服終身
以求無愧家學其誠鱗長之言曰汝也當官若稍懈偷
從不自愛護來也又曰處不競之地避緇染之塗可以
讀書可以修身可以承先世之風節又曰爾其請教於

老成練士又曰聖人處事每從忠厚戒刻薄兇綜覈甚
善吾慮兇之為怨府也又曰儕輩之交宜謙和靜定斂
藏鋒鏑吾慮兇處同事自恃直道未能降心相從也又
曰京師遊客附聲射利多有窺矚往來宜慎吾子念之
又曰弊後衙蠹剪除固當乃吾視吾子若不能頃刻容
者發之太驟恐施之過當吾願吾子之審處熟思也又
曰少年臨事接物易入輕率恍惚吾子念之凡累言爾
爾莫非義方云

何司徒撰墓志

參議劉孟龍先生鱗長

劉鱗長字孟龍晉江人弘寶之孫垂髫時受學於何公鏡山萬厯四十七年進士天啟初授工部主事時有臯門及浚湟之役中官馬誠揭開工費三十萬鱗長僅以六千金竣事誠怒欲中以禍會丁外艱服除補街道廳大璫估保橋運石費四十萬鱗長核用萬金大忤魏璫削職懷宗立起原官司節慎庫以臺省擅行支放事累逮詔獄謫倖毘陵適大宗伯孫公慎行倡學東南鱗長

師事焉轉南戶部視學兩浙厯官至四川參議時張獻忠破雲南賊黨率衆寇蜀鱗長毅然以恢復為己任屢與賊戰有功復夔慶等郡會闖賊陷京棄官歸卒于家

新郡

志

閩中理學淵源考卷七十七

欽定四庫全書

閩中理學淵源考卷七十八

廣平府知府李清馥撰

清溪李氏家世學派

嘗讀曾祖伯漁仲先生叙族譜繫略云余家世相傳
系出李唐江王之後曩甲午見族人參軍孔文於延
平手家乘相示自武陽流移之後數世昭穆具存其
散處他州者記次甚有序謂余為其宗人蓋灼灼也

歸檢舊譜讀樸祖自序稱先世家尤溪尤為延屬邑
竊意孔文為不謬夙聞奉常曾經田陽奉羊豕登絕
巘祭所謂先廟者子孫村樸業樵漁所居里名翰林
崎在大田縣治之東十里大田未建昔隸尤溪嗣後
在明檢討亦過而拜焉問其高年具稱一支徙湖頭
在李元之世然則樸祖距前祖未遠所聞有據合諸
斯言殆不誣也清馥謹按漁仲先生所叙皆係始祖
以上者今據舊譜斷自君達公為始祖君達公感化

里河洋保人元泰定二年置田莊貫常樂里而住在清溪
藍湖之感化里其溪據湖之端水流而下其色藍故曰藍
湖也二世祖名號無傳惟舊木主題千五位三世祖玉山
公行善好施老而彌篤至六世祖旌義樸菴府君力行仁
義家聲始大再世而第二子南豐令公煜舉景泰庚午鄉
薦受書於戶部主事莆陽黃公聲仲刻志問學詩書之澤
已顯迨萬厯庚辰公之五世孫心湖先生懋檜始登甲科
由是人文踵起遂稱安溪名族嘗考正嘉以前時潛修亮

節之士亦有應述者如紀善先生亮清風夙學望著鄉閭
載在志乘至前修所品待如九世祖羅峯府君受知於周
公孟中中藍先生瀾受學於蔡公元偉何公炯瑞峯先生
鳴陽從游於莊公履豐其親師問學皆有派別可尋已附
見之學派矣今錄自樸菴府君而下并諸前輩派繫逮隆
萬以降心湖諸公蓋心湖先生立朝忠謹清修有進退大
節仍樸先生仕亨懷藍先生拭以易學相師授而幹宇先
生楨有循聲亮節與李公衷一相友善若吾高祖念次府君

卓犖好義敦說詩書有樸祖遺風其樹義尤宏遠矣
若餘隱先生明季遺獻實曾祖伯漁仲公先曾祖惟
念公受業之師也家世隱德未能詳述敬附其大畧
待考焉念次府君及漁仲府君惟念府君本傳別見
國朝編錄

旌義李樸菴先生森

李公諱森字俊茂號樸菴先世肇於唐江王元祥之後
遷江南分居於泉之安溪感化里高曾皆隱德大父則

成公洪武初應詔舉孝廉授將仕郎判大名府內黃縣簿父宗江公修身慎行不樂仕進挾拓田廬以遺安於子孫公少慷慨有志向早歲從師獵涉經史事親奉公式由其道二親謝人間事禮儀畢備追慕未嘗頃刻忘也公席先世遺產復自居積日起輕財重義調窮恤匱凡遇假貸貧不能償者悉焚券契喪不能舉者終不能斂者即助以貲捨藥以資貧病一日道經邑之劍口川見負擔者涉水被溺其心惻然詢諸故舊曰是路正當

延汀漳泉要衝何不作輿梁以濟之衆皆以無力辭公
遂發心捐貲造橋至再不就間忽逢老人有言曰此溪
險急難成長者欲造此橋須先造石塔以鎮之言訖不
見公依言表浮圖數級而橋告成又往莆造江口大石
橋本邑復造龍津鳳池等二十五橋事具邑乘正統間
協造本府黃堂及本邑琴堂又修郡庠黌門及本邑大
成殿以至東嶽五帝殿元妙觀及一應神祠聖像莫不
助資理粧飾正統中遭歲饑荒應詔出粟五千石賑濟

又慕義輸邊三千石有司具名以聞

以上參陳公懋送公之官序朱公撰

墓志陳公紹功撰本傳及縣志

詔旌義民詣闕謝復拜賜贈帛酒饌由

是聞望顒昂聲譽益彰方嶽郡邑循例交薦授官保障鄉邦疏累上覈實命未下適沙尤寇發公以旌義奉檄統鄉之義勇士弟數千勦殄總兵官具功次奏聞授清漳九龍嶺巡檢輿論咸以為未足以償其敵愾之績而公處之泰然且曰三世荷列聖子惠洪恩茲值梗化陸梁當捐軀戮力服勤皇家不避艱險衝冒矢石固分內

事也豈可計資秩之崇卑哉苟能盡職萬一則銓衡自有公論聞者莫不壯其志而期於遠大也瀕行薇垣名卿守令將帥咸以禮餞旌其折衝防禦之勞晉江親舊友契供帳於石筍江之潯時處士陳氏璫素知公者撰序以華其行景泰元年庚午九月也

以上見陳氏璫送公之官序三

年從安溪耆民請調公源口渡至則建廳事修房舍以綏兵卒永春德化前後缺令監司命公攝其篆公所至多惠績二邑咸謳頌之已攝安溪則修公館整儀門以

安吏民數年之間邑政具舉凡百廢墜煥然一新天順
癸未暑雨彌月大浸稽天公所建劍口及龍津三大橋
圯公冒雨省視太息曰百年之功盡於此乎由是民復
病涉公因之抑鬱成疾遂至不起

見朱公撰墓志及
陳氏紹功撰本傳公

自微有官迄白首大都折節為義矜已諾其急人之困
先於已公事既畢然後乃嘗酒食人以是嚴重之計五
十年無曠時虛歲公其性命於功德者乎里中人視公
猶父望公家若庫庾尊之不名稱樸菴長者即有競不

從邑令訊而信李長者之言化逮其弟俊德咸駢為義
公生洪武三十一年戊寅二月卒天順七年癸未八月
享年六十有六娶黃氏本邑感德處士黃氏胄之女有
賢行子五人公既不得志於儒別立書塾置書田積書
萬卷課諸子五子皆賦質超穎凡異卓犖咸有衣冠長
烜義官先逝仲煜受書於戶部主事莆陽黃聲仲刻志
學問應庚午鄉試中式

見陳氏紹功撰本傳及
陳氏職送公之官序

後為南

豐令炳承事郎炯散官不就焯貢太學為南雄司理十

世孫清馥謹述

按公事實見於邑郡志清源文獻陳氏紹功撰本傳
詳哉其言之矣家譜中家傳之外亦陳公紹功所撰
傳為詳而都憲朱簡齋所撰墓志譜中未及錄刻只
有公及妣黃氏遷墓記而處士陳氏璫所撰公之官
序亦未及登載二藁藏於從祖茂夫先生家前歲於
從弟清柱處持出鈔錄蓋陳璫先生字微仲號栢崖
為明初高士性孝友不求聞達宣德間累召不起號

為徵君載在志乘要其人為不苟作者且此公筆札
殊少亦吉光片羽也簡齋朱公當日負碩望其所志
皆精覈今此藁集中亦未載茲就陳紹功先生藁本
及郡縣志之外再節錄朱陳二先生曩時撰述略補
本傳所未登載云爾

再按朱簡齋先生願學藁天順七年十月十六日往
湖頭祭公詩曰乘興相邀弔故人不辭艱險不辭辛
湖頭紅日湖間雨林外青山林下津云云又題云同

寺丞蔡公翼太守楊公興知州陳惠提舉賀文通判
陳睿往安溪湖頭弔祭樸菴李公讀此知公當時所
交契者皆碩彥舊德志乘俱有傳表表而一時氣類
之同遠從弔唁仰見公之德誼所孚矣清馥謹識

縣令李勤齋先生煜

李煜字秉常樸菴次子時清溪科第寥如公獨自奮發
號勤齋以見志用壁經舉景泰庚午鄉試甲戌春闈副
榜署福州羅源縣諭一切謝諸生常禮以大成殿明倫

堂暨東西廡之圯也慨然爰家貲重建之成化六年移
諭江西建昌之南城其庀堂齋饌堂如教羅源時十三
年江右直指保陞南豐令下車詢民利病為之興除邑
城依江旦夕假舟楫渡人不便即躡址鳩工築通濟橋
延袤數百步入德公甚立石于橋左頌焉已復建山川
社稷壇壝立魯子固先生書院設鋪舍建衆安亭政績
詳載太史青齋劉公太常卿廣平程公碑暨太學生興
造記中時多繡屨以最聞擢有日矣顧公非其好也致

政歸為鄉名德凡若而年今名宦鄉賢並祀之平生慷慨好施不事家人生產自博士至牧長二十餘年所至以清白稱宦遊資用悉從家輦致獨喜營建造福於民宛然先公遺意焉

紀善李東臯先生亮

李亮字文誠家貧植品嗜學事親盡孝邑令以孝友大書于旌善亭見邑志由明經教潮陽調任四明陞淮王府紀善正德間致政歸老進階長史淮王賜之詩云論

道經邦得老成年華驚見鬢絲盈丘園思切三章疏魚
水難禁十載情酒熟山中應索醉鷗閒海上可無盟明
朝遣問須經對莫使江都獨擅名公之為紀善也傳王
世子一日戲捋公鬚公正色拂袖引疾抗辭王數慰留
不可居家絕跡公門士論高之督學高公委官存問嘉
靖癸巳冬姪婦林陷賊投水死公年八十又一矣為詩
三章以弔之如古風人之長言嗟嘆公生平不隱惡不
虛美其節概有如此者壽八十五終祀鄉賢名宦

文學李羅峯先生鏜

李公諱鏜字時和號羅峯事繼母張盡孝愛諸弟養而教之無同異少俊穎督學周公孟忠行部延平過湖夜宿清溪宮竒湖中山水曰是必有俊彥數顧問此間佳子弟盍與俱來公年十三長未四尺踊於叢而觀貴人周從高望見一少小衣服嫺雅傳呼以入公躡級及堂拜起有儀試一題即其旁立成呈畢出周曰雖其齒未也作養則有餘立與附庠既去留題宮壁曰迨述漳平

四日程清溪夜卧到天明年豐已喜民安堵村靜不聞
犬吠聲自是山川留過客却教風雨阻行旌搜求俊彥
充庠序從此湖頭多顯名為公作也題在嘉靖癸卯後
三十餘年奉常成進士族中累登科第踐班行踵相接
為達官卿相先正篤學清修精爽不二言若持券可謂
先覺公治家嚴肅祭先必豐潔簋有常物晚稍耗當祀
少一鵝恚累旬不自懌蓋至性之厚鄉里推重此其一
端也

清溪李氏家譜傳

附文貞公識詩後

明嘉靖季學使者周公取道吾鄉阻雨信宿羣兒聚
觀因試以文拔二人入泮高祖與焉臨行留此詩署
曰木鐸道人題時鄉族間發解者纔一二自後科第
遂盛今四十餘人矣長老以為詩識故勒石所駐山
隈不忘其志也玄孫光地謹識

通判李中藍先生瀾

李瀾字子觀別號中藍自幼警敏刻勵嘉靖丙午鄉薦

凡九上春官弗售至隆慶辛未年望父矣遂謁銓為衢
州府通判仁心為質上下信之嘗攝郡篆又嘗假令於
龍游常山江山開化諸邑諄諄曉諭無煩鈎鉅獄訟衰
息政教流行倅掌錢穀瀾矢心冰蘖毫無緇染性樸呐
不能與世俗低昂適當事者媒蘖之瀾方送織造留都
聞其萌芽即拂衣歸里杜門謝客居五載而子栻生瀾
志行敦篤事父母至孝每先形聲迎志意曲當其歡心
居喪號擗如不欲生兄沒諸子未長瀾子之平生所為

在倡義舉恤貧之割私田以充公祀時時捐橐金佐族
衆婚嫁死喪之不贍給者郡饑出粟數百斛賑掠郡人
德之文簡黃公鳳翔嘗曰公里居嘗招余與詹司寇飲
儀制君

即心湖先生

之封君在焉公縷譚今古間一舉觴封

君侑以壺榼代勸酬而公泊如也若不知人間有引滿
浮白事者其真樸類如此又云某嘗過衢郵邸問郵卒
李使君昔日治衢何如卒曰清甚宗伯曰使君故有家
無藉衢為肥也卒曰公見肥人不喫酒炙乎恨不兼人

噉耳宗伯笑頷之歎曰李公李公當於古人中求之矣
鏡山何公又云公所居在喧湫闐闐中以道自高謬然
如深山大谷寡接於世無競於物而其無名之樸自足
鎮俗而維風可謂先進君子矣公仕本非好出見人之
求致高官大爵者真不覺如楚人畸客見夥頤之為沉
沉者爾先生受學予先子有子拭舉進士卒年八十九
崇祀鄉賢

黃文簡公撰墓志
先生撰本傳

閩書

縣志

何鏡山

太常李心湖先生懋檜

李懋檜字克蒼號心湖安溪人旌義樸菴公六世孫總
角馳文譽才擅一時萬歷八年進士除六安知州以愷
悌稱入為刑部員外郎長貳舒公耿公雅相慕嚮懋檜
一日抗顏而前言讞獄非是者三其一謂中官與兵馬
司詔獄失出可慮一則臨江守錢若賡罪逮父老詣闕
誦冤者年俱近百並謫口外可矜一則侍郎洪朝選以
勘遼藩忤江陵相指閩撫勞堪希相意寤死之獄中莫
為申理者最後司寇僅當勞近戍其假旨及擅殺大臣

法皆不蔽罪可恨懋檜言之激切二公斂容謝之舒竟
致其事去緣是負伉直聲會詔求言懋檜上疏陳九事
以應曰保聖躬安宮闈節內供御近習開言路議蠲賑
慎刑罰重舉勅制限田纏纏千百言皆切中利病其中
安宮闈御近習二事尤聞者縮頸噤舌大畧謂上近封
貴妃為皇貴妃矣而恭妃尚仍故秩臣願亟行冊封如
皇貴妃之例何者貴妃以皇子得封乃恭妃則誕元子
者元子國之本恭妃異日為國之母夫使國母位次皇

貴妃下臣有以知皇貴妃之必不安也寧惟貴妃即皇上心亦必不安也臣不揣自今以往恭妃見皇貴妃禮能如前日乎能無跼蹐自疑乎夫使儲君國母兩懷自疑恐非皇貴妃之福臣以為宜益封恭妃位在皇貴妃上即不然亦當使與貴妃徽號同恭妃安則國本安矣而左右摯御宜準周禮冢宰之制三載別其淑慝而去留之是時上意淵深無人敢涉國本事獨懋檜與部郎劉復初顯指貴妃言之同日章並上上怒欲加重譴言

者猶不已閣臣請上詔諸曹建言止及所司職掌以慰
解上意居數日上亦霽威諸疏皆留中而懋檜所條餘
七事亦寢不行會邵庶上疏請禁各官非言責者毋輒
言又欲令各堂官禁其屬言懋檜上言庶因世延條奏
波及言者欲概絕之防人之口甚於防川庶豈不聞斯
語哉今天下民窮財殫所在饑饉山陝河南婦子仳離
僵仆滿道疾苦危急之狀盖有鄭俠所不能圖者陛下
不得聞且見也邇者雷擊日壇星墜如斗天變示儆於

上畿輦之間予弑父僕弑主人情乖離於下庶以為海
內盡無可言羣臣盡可依違澶涇默默固位已乎夫在
廷之臣其為言官者十僅一二言官不必皆智不為言
官者不必皆愚也無論往事即如邇歲馮保張居正交
通亂政其連章保留頌功誦德若陳三謨魯士楚者並
出臺垣而請劍引裾杖謫以去者非庶僚則新進書生
也果若庶言天下幸無事則可脫有不虞之變陛下何
從而知庶復以堂上官禁止司屬為得計伏覩大明律

百工技藝之人若有可言之事直至御前奏聞但有阻
遏者斬大明會典及皇祖卧碑亦屢言之百工技藝之
人有言尚不敢阻况諸司百執事乎庶言一出志士解
體善言日壅主上不得聞其過羣下無所獻其忠禍天
下必自庶始陛下必欲重百官越職之禁不若嚴言官
失職之罰當言不言坐以負君誤國之罪輕則記過重
則褫官科道當遷一視其章奏多寡得失為殿最則言
官無不直言庶官無事可言出位之禁無庸太平之教

有致矣上責其沽名命貶一秩科道合救不允庶偕同
列胡時麟梅國樓郭顯忠復交章論劾乃再降一秩為
湖廣按察司經歷懋檜雖放斥外幕而忠益勵氣益奮
至謫所聞邊警復郵奏安邊之策宜用馬端肅俞武襄
車制禦邊而薦趙文毅有文武才大將則舉朱先郭成
黎國耀等疏再上不報久之量移南通政司經歷歷禮
部主事丁外艱歸服除赴補牘數上不獲命旅食京師
者三年而不知已疏名御屏錮不用矣乃告歸自是里

居者二十年當道屢薦無虛月神宗晚廉其忠丙辰即
家起南兵部主事懋檜念母老乞養歸遂轉員外郎尋
丁內艱光宗立錄舊臣起禮部郎中遷光祿少卿轉太
僕少卿一歲三改命已復不調者三年天啟四年以北
太常召而懋檜已於是歲卒時年七十有一懋檜為入
見事敏審機豫方蚤歲即已留神世務練習朝章而精
心密理足以運之藉令循循任職拾級而上亦足以致
功而夷然不屑繇其謇諤之素遇觸必發蓋根於天性

然也居家篤根本落成籍構宗祠表揚祖德緜緜捆載
平生廓落無町畦無賢不肖咸以為親已素所交遊如
鄒吉水姜丹陽呂賓陵魏南樂顧錫山許東陽蔡龍巖
等皆號知交然時相規正有不與俱靡焉者衡文取士
則李長庚魏說李若愚陳所蘊何慶元宋之禎亦當世
名卿其直言敢諫安邑自詹仰庇而後僅見懋檜一人

耳
明史 邑志 家傳 墓誌

李仍樸先生仕亨

李仕亨字克澹號仍樸生性樸厚少清苦讀書淹究經史早有文名天啟二年成進士年已五十九矣初授戶部主事監大通橋丙寅督餉山西革招買蠹規商人懽悅時二閹至頗有忤言然終敬其清白莫能涇也戊辰出守嘉興三載政簡刑清凡父母子弟相為訟俱不譴訶而使自化其自誌云不取一虧心錢不受一無處餽覲後即引疾歸著書課讀修葺宗譜皆崇厚力本之事閉戶絕應接復自號迂叟仕亨為諸生時力學傳教名

輩多出其門族叔中藍公延請教其子棡孫日舉皆積
年受業所著有四書注翼易本義翼四書解易解雜著
迂言編皆以迂名焉崇禎丙午年卒

郡志
家傳

邑志

臬長李懷藍先生棡

李棡字克儼號懷藍安溪人父瀾鄉榜官別駕有清望
見蔡松莊學派棡萬厯庚子鄉書癸丑進士授刑部主
事多所平反出守維揚加意恤民治漕理鹽善政猶傳
舊有織造稅例一切革除之丁艱補潮陽潮故多盜至

則立里保嚴警衛自是盜患寢熄有巨猾勢厚黨劇播
惡莫敢忤視拭剪除惟亟需時屬托千函悉委于歛既
斃而懽歌者比戶時擬之除人鱷焉注意作士譽髦鵲
起潮人衣冠之盛則自拭作牧始轉陞高肇副使七載
緝盜安民聲績顯著晉大參分鉞端州道威望益隆最
為百世利者造太平驛通濟橋為文記之廣人士誦德
歲餘陞雲南按察使值土酋跳梁梁拭承委督餉鞅掌匪
遑卒于官拭受易學於族兄仍樸先生自齟齬至登第

無二師凡承易旨皆集而演之刻趨對編杖守先世田
廬退不營山海之利進不取公帑之餘以經術垂訓子
曰冕天啟五年進士由中書歷官至廣東副使

郡志
邑志

家傳

審理李幹字先生楨

李楨字克輔別號幹字安溪人萬厯丙子舉人授安化
令時萬厯之季海內蓋有開採之役璫陳鳳指縣有硃
砂礦剋期興役上官莫敢議楨曲奉而陰阻之事得寢

陞茶陵州知州鋤奸剔蠹視安化有加以不能結奉上
官再調臨高縣因地震請罷稅礦一郡俱席其庇遷王
府審理歸卒年七十有四何鏡山先生撰墓志略曰公
推魯狷介一似木強人而中懷潔白先哲自將心常在
國家意常係斯民第不能修上官之名譽而候其顏色
所以三仕不失令三令不能得美遷者乎公三調劑開
採之後其大者矣其他省訟絕饋興學慎獄緩征斂重
符信鋤奸梗以公廉自誓而以移風易俗望民蓋所至

若一是一上官有商彝秦鏡之褒楚民有耳勁筆貴之
謠至楚值征播之役粵值欽州之變公佐飛輓靖羽檄
其通變之才不可以木強論者也余與公早歲悉有四
方之役迨公懸車則余謫官里居二十餘年矣居常過
公但見公編蒲緝柳無虛日月暇則鼓漁陽搥為三弄
而已所著有狷介編若自為譜者外有問奇便覽仕隱
緒言家藏年譜官中獨鑑諸書

何司徒撰墓志

李瑞峯先生鳴陽

李鳴陽字克儀別號瑞峰十洲公長子鳴陽學問根柢
馬班於博士家言涉獵耳少壯甚自負久之數困棘闈
兼家喪頻仍而父祖戶務殷繁悉身肩之用此紛拏決
棄纓鎖性伉爽輕財慕范文正公陶靖節為人有急必
赴有侮不恥信心而行不求人知習與游者如莊梅谷
黃一龍兩先生蓋相知之深者也鳴陽檢身方正嘗思
謹言慎動寡欲節飲四箴以自警所稱述皆先獻格言
一夕獨坐書室有美姝塞簾求貸鳴陽正色不動量探

篋中錢遺去人方為魯男子云晚退居先公舊隱自為
舊隱歌留心家譜綜核詮次特詳要於闡揚先德誘誨
族屬文翰炳然誠家世之琬琰也自為壙志曰年近古
稀不可謂不壽學知崇正不可謂俗流生平抱莫知之
歎不可謂終身皆未定之天蓋自信無所愧怍齊順逆
一死生非深於道不及此

家譜

進士李在明先生光龍

李光龍字蟠卿號在明安溪人誕生時祖瑞峰公夢杜

工部來訪覺值光龍生七歲父命對垂桴浮於海光龍
應聲束帶立于朝年十三從族叔肖巖公偕芳受易時
里中多治尚書惟肖巖素治易精熟光龍年雖穉殊有
悟稍長與閔瀛叔父鳳鳴同學又偕叔寶峰受業于孫
伯紫先生

疑即本傳中孫司理胎湖侯詳考

每構義屈行輩自言稍長

為舉子業亦能帖括一二歸索家中遺書得馮班全集
縱觀之玩味至忘寢食益厭時師訓詁學遂上及六經
旁及諸子下至宋諸儒近代諸名公俱欲究其指歸汰

其緒論又言自戊午以後讀書仲悔兄齋中桃源陳子
因公車歸必攜笈就焉三人同席相證者不斤斤舉業
專以品行相勗旁及經濟深究性命壬午出揭潛銘重
熙房薦於主司稱光龍易學純深備采作程會試過江
上阻寇而反里中士大夫競勸曰時事須公豈為斗祿
哉於是強行癸未登進士第後為本房薛行塢所蘊推
重而房首為白東谷肩謙尤一見傾服是時光龍名重
有速之應中秘之選者顧光龍愀然私謂薛師曰京師

焚埃黷黷磚瓦咸碧即不習五行傳而吉凶居可知矣
不廷試遂歸山中日與宗黨親朋沉淪詩酒閒尋方外
交戊午之間里中大變光龍深心潛力委蛇而坐消之
事平後人始推其安鄉里之功光龍生於郡城負郭窮
巷屬家道中衰旋移故里稍長即問家世之所以廢興
狀因就外傳家貧素不事生產業浮沉諸生者最久然
其才為國幹學足世儀郡邑大夫數式問問政嘗講切
師友於同郡黃東崖林平菴諸公有往復載集中可考

平生著作不甚篋藏諸子頗收十之三未刻目曰閩山
集卒年七十五時康熙乙巳年也宗中受業者族叔漁
仲先生日燦惟念先生兆慶皆稱高弟焉家傳墓志
閩山集

邑志

閩中理學淵源考卷七十八

欽定四庫全書

閩中理學淵源考卷七十九

廣平府知府李清馥撰

清漳明初諸先生學派

按文勤蔡梁村先生漳郡志序曰維漳郡始於唐初
僻陋濱海自有宋朱文公涖郡以後陳北溪王東湖
親承其統緒道術既一禮法大明明代陳剌夫蔡鶴
峯諸賢又起而賡續之流風餘韻至今猶存云竊嘗

敬讀先訓論近代人物盖于清漳留連不置聞彼間
風土山川靈異潮波安恬水汐時石岡嶙峋挺峙其
清淑磅礴之氣鍾為人傑不亦宜乎茲將洪永宣正
間先正學派錄具著者載于篇

總憲劉愛禮先生宗道

劉宗道名駟以字行龍溪人洪武壬辰徵秀才八十餘
人入試朝政宗道第一仍命學士詹徽密察諸儒中特
異者居德行第一以布衣侍坐共論治道拜都察院左

都御史上格君澤民二十事言甚切直上命所司採行之自是議大政多所譏切遂為邵質董希賢所構詔徙南詔不久貫還宗道明程氏學好脩家禮鄉人稱愛禮先生有愛禮集十卷陳真晟讀之稱其繼北溪而起大有功於名教云

編修李先生貞

李貞南靖人永樂十三年及第第二人授翰林院編修與儒臣編緝四書五經性理大全後以不肯預修佛書

貶高州府教授卒

孝廉林先生皞

林皞長泰人志行高亢刻意學問與林震同學為震所推永樂庚子與震同領鄉薦後隱居不出自號後岡處士後進皆師表之

閩書

評事胡先生宜衡

胡宜衡名橘以字行宗華子性敏嗜學謹厚莊重孝事繼母漳人及門甚衆永樂十七年以賢良薦授翰林院

中書舍人與修成仁二廟實錄上為善陰隲詩賜金帛
文綺陞大理左評事居官清苦尋引疾致仕

閩書

柳先生文通

柳文通平和人父沒既除喪當就試其母止之遂不復
出居家教授生徒戶屨常滿所居西林凡西林之占一
經者皆其徒也

閩書

吳汝華先生霞

吳霞字汝華海澄人邑庠生天性孝友篤志好古即所

居傍築小室扁曰顏巷聚書其中其潛玩程朱至忘寢食諸儒語錄行錄悉手抄讀每語門弟子曰世無真儒學之一字弗明也學字既明士風自變矣又曰其本在立志其要在主敬所著有射禮輯說道原錄抄義集抄學則拾棄稿示兒編皆有闕世教年八十餘卒長子邦懋生員有父風

閩書

閩中理學淵源考卷七十九

欽定四庫全書

閩中理學淵源考卷八十

廣平府知府李清馥撰

州守唐東里先生泰學派

唐公在明代國初沈潛經訓諸名德多出其門實倡起之師也

州守唐東里先生泰

唐泰字師廓長泰人資稟迥異通曉五經尤邃于易登

永樂十三年進士知祁州有惠政後以文學薦辟召赴
文淵閣試麒麟頌明倫論稱旨欲大用之因大駕北征
遂乞歸侍養四方之士受業日衆乃築草舍百餘間以
居之隨才誘誨皆有成就如陳布衣真晟謝侍郎璉林
脩撰震陳考功壘皆出其門著思誠齋銘學者稱東里
先生 道南源委 郡志

侍郎謝重器先生璉

謝璉字重器龍溪人宣德丁未廷試第三人除翰林院

編脩試詩稱旨嘗從謁長陵獻陵對述稼穡閭閻利弊甚悉丁艱服除與脩宣宗實錄及令典聖鑒日厯諸書因災異陳言請出宮人又請赦諸無辜及除連坐法尋遷侍講正統十四年上言時政十五事中言石亨不可專任尚書于謙知軍旅大臣胡濙堪付托事後若懸鑑而築城龍巖建守禦亦璉所議也秩滿陞南京戶部右侍郎創便宜六事為經久可行之規明年兼掌兵部務時戶部郎陳秀坐誣下獄璉力爭之秀乃得脫景泰癸

酉以疾卒于官詔遣中使泣喪諭祭葬故事翰林居養
優地徒以筆翰相高慷慨論朝政自璉始著有奏箋百
餘卷及玉堂藏集

修撰林敦聲先生震

林震字敦聲長泰人事繼母至孝家貧力學每樵耕挾
書自隨卧樹下仰讀不輟宣德五年殿試第一人授翰
林脩撰正統二年以疾告歸娛心書史非公事不至郡
邑廣藩兩聘主試號稱得人卒于家

閩書

郡志

布政陳尚勉先生廬

陳亶字尚勉漳浦人師事唐師廓與陳剝夫為同門友
登正統元年進士歷官吏部郎中文章政事為時所重
威喇犯邊守臣失策作備邊禦戎策以獻天順四年廣
東盜起廷議必得陳某乃可除廣東布政使時英宗初
辟勵精圖治召入內殿賜宴遣之既至密相機宜討平
新興撫定德慶蓬州等峒賊患遂息以疾乞休著有經
籍要覽梅菴存藁羣從多以科第顯

道南源委

閩中理學淵源考卷八十

欽定四庫全書

閩中理學淵源考卷八十一

廣平府知府李清馥撰

布衣陳剝夫先生真晟學派

按陸清獻公問學錄曰吾學編以胡敬齋陳剝夫附于白沙之傳此其失莫甚焉敬齋雖與白沙同遊康齋之門然其學固非白沙所及陳剝夫著程朱正學纂要雖其教人專一靜坐陳清瀾謂其學識未及胡

敬齋只是狷介之士然亦非白沙禪學之比而乃以
附白沙之傳何哉按此陸清獻公衛道之嚴也白沙
雖與敬齋共學于康齋實同門而異戶布衣先生其
用功實從主一之訓入其學術端默沈潛持守有餘
前輩楊氏廉以為和靖之徒明史傳謂其潛思靜坐
其學近吳康齋陸公以為狷介之士殆確論歟

布衣陳剝夫先生真晟

陳真晟字剝夫漳浦人浦濱海患倭洪武間其先世自

泉中調戍漳之鎮海衛因家焉先生丰格高聳神氣肅
清望之非塵埃中人也年十七八即能自拔于俗厭末
作之蠹心惡異端之害道專心致志以儒為業入長泰
山中從進士唐泰治舉子業業成薦于有司至省試聞
有司防察過嚴無待士禮遂辭歸自是不復以科舉為
事務為聖賢踐履之學初讀中庸做存養省察工夫覺
無統緒繼讀大學始知為學次第又讀大學或問見朱
子博採主敬諸說以補小學工夫始知敬者乃大學之

基本也及求其所以為敬則見程子以主一釋敬以無適釋主一始于敬字見得親切乃實下工夫推尋此心之動靜而務主于一靜而主於一則靜有所養而妄念不作矣動而主于一則動有所持而外誘不奪矣嘗語人曰大學誠意章為鐵門關難過主一二字乃其玉鑰匙也蓋意有善惡若發于善而一以守之則所謂惡者退而聽命矣又曰人于此學若真知之則行在其中矣蓋以知之真則處善安循理樂其行甚順然而氣質有

偏勝嗜欲有偏重二者用事其順而易者反逆而難矣
此聖門論學於學問思辨之後又加以篤行也天順三
年用伊川故事詣闕上程朱正學纂要其書首採程氏
學制次採朱子論說補正學工夫次作二圖一著聖人
心與天同運次著學者心法天之運次言立明師補正
學輔皇儲隆教本數事以終圖說之意書未上先上疏
乞召見而陳其說不報及書上奉旨禮部看了來說署
部事侍郎鄒幹漫不知其說云何其事遂寢歸家讀提

學使者頒行勅諭教條有合於程朱教法喜曰此學校正教也然學校雖崇正教而科舉不定正考雖有正教不行也因採勅諭中要語叅以程氏學制呂氏鄉約朱氏貢舉私議作正教正考會通定考德為六等考文為三等各有按例可據而行又纂長書以告當道諸君子諸君子亦不能推行其說其事又寢凡先生學有所得者至是皆無所遇聞臨川吳聘君名欲往質之乃貸其家之直得五金攜其兄子以行戒之曰我死即瘞于道

題曰閩南布衣陳某墓足矣行至南昌張東白元禎止
之宿叩其所學大加稱許曰某敢僭謂斯道自程朱以
來惟先生得其真吳許二子亦未是如聘君者不可見
亦不必見也遂歸鎮海初創戎壘自先生為學而儒術
始正自先生與莆人李文舉諸先輩講行文公家禮而
風俗始正先生生於鎮海遷於龍巖晚定居於漳之玉
洲自以布衣詣闕上書因號布衣學者稱為布衣先生
成化十年卒年六十有四後十年學使周孟忠為文以

祭郡守彭桓立石官道傍以表之題曰大明闕下雨上書請補正學泉南布衣陳先生墓所著有布衣存稿藏

于郡齋

道南源委 閩書 林氏雍撰行實

家譜傳

郡志

明史

布衣先生文

答周公載

所論欲搜剔聖賢微言緒論而紬繹之以庶幾深乎道殆是也蓋搜繹亦窮理之事大學之要莫先於窮理豈不信然然以程朱之學揆之要必先求其所以能紬繹

之者以為之本然後可也若無其本則雖欲勉強以紬
繹之亦不可得也蓋義理之聚於物猶蠶絲之聚於繭
至精深微密者也今欲紬繹之於繭為易蓋引其緒以
出於外者也於物理為難實游其心以入於內者也故
苟非先養其心使有剛銳精明純一之氣則安能入其
微步其精以詣其極隨其表裏精麤之處無不到而脫
然盡得其妙於吾胸中乎妙有不盡得則雖曰紬繹猶
未紬繹也如一物有十分道理已繹到八九分則一二

分繹不得此一二分正其所謂精妙者也精妙者既不
能繹則其所繹者八九分皆其麤者耳得其麤昧其精
雖謂之全未紬繹亦可也且但一物不能繹則物物皆
不能繹譬如印板但印出一張糊糝則張張皆糊糝心
麤之病何以異此苟如此而欲望深於道殆難矣矧道
不惟精深實且廣大蓋合衆精深而為一廣大者也故
既不能析之極其精則必不能合之盡其大所謂物有
未格則知有未至者此也然所以合之者又須此心先

有廣大之量然後能也故先儒曰入道莫如敬未有能致知而不在敬者又曰涵養須用敬進學在致知所謂敬者豈非涵養此心使動而窮夫理則有剛銳精明純一之氣靜而合夫理又有高明廣大之量者乎凡此皆有真實工夫做到至處所謂聖學也程朱之學入道有門進道有階升堂觀奧皆有明轍惟此最為要法誠不可不先講而力求者也

夫學一也豈有道俗之分所以分者在乎心而已矣故志

乎義則道心也志乎利則俗心也以道心而為俗學則俗學即道學以利心而為道學則道學即俗學只在義利之間而已矣惟在朝廷則不然朝廷風化攸繫故以道學鼓天下則天下皆道學而義風盛以俗學鼓天下則天下皆俗學而利習熾此程朱所以皆欲朝廷革俗習而崇義方有以也若君子自學苟立志有定則無不可者也何俗為

答何叔

今之學者皆言居敬多只是泛泛焉若存若亡而無主
一無適之則是未嘗居程子之敬也皆言窮理亦只是
泛泛焉務多讀書而無即事窮理之精則是未嘗窮程
子之理也

蔡九峯之學未得為淳只觀其自序乃以窮神知化與
獨立物表者並言亦可見矣若物之表果有一個獨立
者則是莊列之玄虛康節謂老子得易之體正亦同此
是皆於體用一原顯微無間之旨見得不透徹故也

備考

張淨峰先生為鎮海衛鄉賢祠記畧云景泰天順間布衣陳公翠渠周公二先生同時產於鎮海皆以學行有聞于天下二公蓋為聖賢義理之學者嘗聞布衣少食貧業作末藝一日遇鄉校聞講中庸戒懼謹獨若有會於心者遂棄其業從之既復讀大學格物致知之訓知其與中庸相發明又知其工夫真切不越乎敬之一字故其學以默坐澄心反躬踐履為本於章句文義蓋有

不數數然者翠渠自業舉子時已不安於俗學之陋其學自六經四子天文律厯字畫及方外之書無所不究而每以辨析精微洞見本原為歸宿之地蓋二先生之所自得其所從入如此鎮海故戎壘自二先生後人始知學至為立博士弟子員以教養之嘉靖乙酉豐一齋先生熙謫戍是壘嘗舉二先生之學為學者言之既又以祠事言提學使者度隙地為屋三間並祠二先生既成馳書于岳俾記之岳之先世蓋嘗講于翠渠者而

布衣之言論風旨亦嘗竊聞其大畧如此又曰當二先生時士大夫以講學有聞者多矣為說皆務高遠考其要歸能無憾於後學者蓋鮮獨二先生之學粹然本於考亭無議也昔朱子有言曰子思以來教人之法惟有尊德性道問學兩事為用力之要然學者性質趣識不能盡同大抵多因其所近者而入誠能兼取二先生之所用力而反之於身以審其先後之端如病者用藥陰陽寒熱期中病源而不至于偏勝則庶乎有合於聖人之

行無愧於二先生矣布衣名某字某泉人翠渠名某字某甫人初築壘時調二郡之人戍守之蓋守者子孫云
戴山劉氏曰一者誠也主一敬也主一即慎獨之說誠
由敬入也剝夫恐人不識慎獨義故以主一二字代之
此老學有本領故立言諦當如此是故東白得真之言
亦定論也

郎中林蒙菴先生雍

林雍字萬容龍溪人景泰五年進士授行人以母老乞

歸養終喪起就職憲宗初政上疏勸脩德格天親賢講學復請進周惇頤程顥程頤朱熹于顏曾思孟之後列為八配又請祀陳淳兩廡並不報遷為司正先是諸行人出使往往以賄聞雍厲操先諸公諸公皆自愛惜屬吏部考察雍獨不赴曰使某不勝任黜之可也安能隨行俛首言科目籍貫耶陞駕部郎中未幾乞歸命下忻然就道長安縉紳賢之相與詠歌其事歸結廬龍山從布衣陳先生真晟相師友日與徒侶講明正學謀之林

僉憲克賢姜郡守諒建祠祀北溪芝山麓又與鄉人月
為一會脩藍田呂氏鄉約累徵不起年七十餘卒陳先
生真晟稱雍學始終本末有序有要督學周公孟忠稱
其居官冰蘖未老乞歸清風高節海內傾仰漳人謂北
溪之後得正學之傳者真晟與雍二人而已學者稱為
蒙菴先生

閩書 漳郡志

備考

周翠渠送林蒙菴序畧曰先生學平實不矯飾以為偽

處事多委曲詳慎無直遂每公退坐一室左圖右書檢點其身心自慮念之微以達於事為之著務合於道義間有不合如被穢在躬力褫去之乃止嘗語瑛曰凡學不過欲得此心而已心不可外天理人事以求之也處人事以合天理則此心得矣若厭人事而慕高虛惡積累而求超脫皆非學也

侍郎魏仲禮先生富

魏富字仲禮龍溪人少孤學于布衣陳真晟翰林謝璉

之門成化丙戌進士授監察御史繼按廣東林蠻洞蜒
為厲廉得不法吏若干人置于理蠻蜒皆復隸編戶遷
浙江按察司副使重舞文告訐之禁有縣令為豪猾所
誣久坐繫同官莫敢直富直而釋之脩蕭山諸暨石塘
堤以捍田發粟賑嘉湖寧台饑存活萬餘人陞江西按
察使擢右僉都御史巡撫順天畿內地中貴人及將領
守臣多操利匿亡互相倚援富部分將領授以成算一
時無犯者疾作乞歸後起用南京大理卿正德改元陞

刑部右侍郎乞致仕給驛歸富歷仕四十餘載隨事盡職未嘗立異譽輒隨之疏衣糲食自奉泊如焉

閩書
郡志

丁迂峰先生世平

丁世平字迂峰龍溪人從學陳布衣布衣詣闕上書世平詩送之曰先生學趣似陶淵嗜酒忘形老益堅心借程朱五百載道憂孔孟三千年一筇策破關山月雙棹撐開泗水天歌詠歸來吾與點半生辛苦付恬然

閩書

嘉隆以後諸先生學派

紀道範先生孚兆

紀孚兆字道範海澄人僻處海陬卓然自奮極力營辦
以事父母授徒他鄉朔望歸省有餽送懷歸父母色不
豫率妻蔣跪問必得其懽居喪悲痛不入卧房廬墓三
年衣冠古樸與人拜酬輒命子弟執往不屬童僕所教
生徒皆以正學為本兼及當世之務晚年以程朱為的
其學益進如蔡烈林一陽潘鳴時皆傾心下之所著有
心極圖說妻蔣事姑愛謹

閩書韋布

陳欽齋先生鳴球

陳鳴球字舜夫詔安人性至孝兒時即定省如禮家貧力學不事口耳嘗與湛甘泉論體認工夫謂工夫無處不貫然下手處不可不知甘泉大嘆服之後又與薛中離講明良知之旨證吾心之無二球明于理學而於天文陰符諸書尤為精曉所著道心圖體認要解及欽齋集外有陣圖解其卒也友人林士章題其石曰明處士欽齋陳先生之墓

郡志

州判潘徵求先生鳴時

潘鳴時字徵求海澄人家貧就外傳樵採以資學業讀書龍嶺巖得王文成傳習錄讀之遂負篋吳會謁王龍溪畿錢緒山德洪歸來自以為有得也益聚徒講論行鄉約積義倉練鄉兵為政枌榆間會五寨草寇發竟以鄉兵擒之隆慶戊辰領恩貢入太學歸則講徒日衆久之叙選判信陽州以拂當道謝去逾年卒所著有讀易偶見語錄等編門人吳道濂蘇攀等為創祠南山寺之

東偏祀之閩書 郡志

縣令林復夫先生一陽

林一陽字復夫漳浦人嘉靖甲午鄉薦為學以居敬窮理為宗謂道至程朱有何不盡何須別立教門及判濟南調霍邱令皆有惠政以不諧於時遷藩幕歸嘗曰惟敬勝怠惟勤補拙惟儉養廉所著有論學義又善臨池大書有晦菴白沙筆致

孝廉高先生則賢

高則賢龍溪人貌古行樸動法古人性沈密善講解嘗
持周易本義程子易傳端坐雲洞中一年始出作易解
士多宗之為文覃思至深能抒寫其所自得晚貢成均
萬厯己卯舉順天林宗伯士章延之西席都下諸公皆
願識其人而賢即世矣

閩中理學淵源考卷八十一

欽定四庫全書

閩中理學淵源考卷八十二

廣平府知府李清馥撰

漳浦蔡氏家世學派

縣令蔡丕禮先生大壯

蔡大壯字丕禮漳浦人性友愛篤志勵學受業周翠渠
之門告以主敬工夫克然有得由舉人任寧鄉知縣開
渠灌田履畝均輸撤淫祠禁溺女又重刻翠渠祠山辨

教民雜錄等書授鄉老以教子弟嘗書居敬二字於衙齋銘曰遠敬君近敬身幽敬鬼神明敬人必至無所不敬庶幾不負吾學不負吾身凡折獄必引經文為斷民以事至邑者必問曰讀書乎則告以講習之法或以貧辭輒勉之以入覲告乞歸所有田宅悉以均諸兄弟著毛詩釋義

主事蔡震湖先生宗禹

蔡宗禹字寶元漳浦人秉性剛介明敏過人少年讀書

但求大意不事鈎索乃父教以因經求道因物求知一
日大省萬厯間貢入太學大司成葉臺山稱為天下士
屢贈以詩于是聲名藉甚登萬厯辛丑進士司李鎮江
甫下車首嚴左道之禁勸諭空門還俗僧僚院宇置役
守之以絕士女之往來而緇衣黃冠徑入人家者有罰
法令嚴明人莫敢犯惟罪跡未著或已著而情屬可矜
者率多平反郡丞某墨而殘欲以其私害人公爭之強
致失丞懽丞方攝郡上官檄公使代之丞益恨構陷萬

端遂被劾謫湖州照磨覈其事皆烏有未幾丞亦敗彈
丞者以螫公為名公得白補授白水令冰蘖自矢園有
椿樹植之以佐食蒼頭短衣不完所得俸錢悉以興校
資貧士凡有淫祠悉改為書院而逐其住僧日與諸生
談經講道其中講畢必謂曰吾所持以為治者此耳然天
下事宜古不宜今者多矣凡諸政令有不利于民者諸
生匡我焉歲饑貧無可賑勸諭諸富室為糜以濟而自
賦詩以歌其事富室益樂於為善全活不下萬數事聞

陞刑部主事以疾乞歸講學於湖西書院終日正容危坐諸生非加冠束帶不敢至前曉集必拜有問必趨退則一揖而別自臨文作字以至洒掃應對莫不循循然有規矩几席之下儼若朝儀四方負笈來者至房舍不能容別結草廬以居公當風清月白時提茗挈果放舟湖上顧謂門弟子曰活潑地何人解得向來到此塵慮盡消不啻如湖泉萬斛洗腸胃也先儒所謂吟風弄月有吾與點也之意此時光景殆庶幾乎生平為學以力

行為主獨往獨來不儕流俗而婚娶喪葬一遵禮經足跡不至寺觀僧巫術士弗與交談曰磨不磷涅不緇者聖人事也吾輩自揣堅白如何果能磨涅無玷乎吾不能為柳下惠且先學為魯男子或以舉業為道學病者答曰君勿蹈時趨但從程朱講解則舉業即道學矣又曰陳布衣先生有言程朱何嘗不科舉亦以其學居敬窮理而得者以應試而已年七十餘卒先生為人明敏治郡治邑寬嚴並用生平屏絕異學宦跡所經僧道裏

足其闢邪崇正之功更不在韓狄下今子孫猶能世守其訓凡吉凶事不仗僧巫尤近世所希覲者宜為有家之法也所著有明誠解程朱要言續毛詩釋史記一家言叢桂軒語錄杜詩註釋等書學者稱震湖先生時江右羅公倫浙中豐公熙皆謫戍濱海而同邑薛公士彥亦自雲南布政使致仕歸相與講明正學有鄒魯之風子一橙

孝廉蔡廷黃先生一橙

蔡一橙字廷黃號伯梁充養和粹雅志經學黎明即起危坐曰此平旦清明之氣也孟子所謂好惡與人相近者正在此時其焉可錯過或告以姚江良知之說則曰世守程朱門戶未便操戈入室也領萬厯丙午鄉薦每公車北上載籍千卷以行其於濂洛關閩之書雖驢背板橋未嘗釋手曰吾敬此如神明庶幾不見不聞中不敢自肆也著四書提旨詩經會解布衣心圖註與晉江蘇紫溪友善書問辨復甚多子孫各守家學

學正楊商泉先生豫學派

按商泉先生邑志惟載蔣蘭居葉泰窩為及門之士
今附列之

學正楊商泉先生豫

楊豫別字商泉漳平和睦里人早歲設教里中人士多
從之遊蔣蘭居葉泰窩出其門學者稱為商泉先生以
貢仕遂溪教諭陞德慶學正邑志

貢士葉泰窩先生時新學派

按先生郡志列在儒林考本傳以仁讓聞鄉里化之何公九雲贊曰葉君鄉祭酒諸生半在門君乎討性學言行必有藩蓋有道之士也

貢士葉泰富先生時新

葉時新字蒼竹漳平人年四十盡焚其少年雜著與陳文溪蔣蘭居講明窮理致知之學應貢不仕仁讓有聞里人化之晚乃隱居教授里中人士多出其門稱為泰富先生其門人嚴和濟黃佩韋等錄其論學要語數十

則直可分宋人一席其次陳文溪偕曾五溪游龍亭
寺詩曰周旋時事自知閒不落風塵主宰間每泛孤
舟觀碧草也憑佳節歷名山吾鄉幸有真朋聚世道
應看淑氣還記得當年山寺講乾坤此意破玄關

漳平志

黃先生佩韋

黃佩韋傳闕

嚴先生和濟

嚴和濟漳平人邑庠為葉泰窩高弟子卓如

嚴希立先生卓如

嚴卓如字希立漳平人立身端方雖獨處必正衣冠危

坐無間寒暑接人處事一出於誠

漳平志

林先生梅濟

林梅濟漳平人為嚴希立高弟得師門之遺秉心質直
制行溫醇膺選後方在強年不復為仕進計家居課

讀

漳平志

運使曾惟馨先生汝檀學派

運使曾惟馨先生汝檀

曾汝檀字惟馨漳平人以貢入南雍受學于湛甘泉先生嘉靖壬辰舉進士授都察院都事時甘泉為禮部侍郎朝夕親炙及其轉南禮部尚書汝檀亦求改南從之遂遷南戶部員外郎歷禮部郎中擢知撫州府首建陸象山吳草廬吳康齋三賢祠立五經閣教鄉約月朔臨視獎善勸農政暇與諸生講明正學以拂當道意調南寧治如撫州時時甘泉已家居檀往訪焉時安南內亂

久不貢廷議屢勅行勘藩臬難其事檀即請行未幾疏
乞終養道經嶺南復謁甘泉而歸既釋服起補安慶知
府時親藩景王之國道經郡當道議析民居為行宮汝
檀移于城東空濶處及王至供億整辦尋陞山東鹽運
使逾年卒官汝檀資稟厚而信道篤所學淵源於陳白
沙刊落支節務窺本源歸家以養親講學為事與諸生
論經旨但遇舊說分析太過處必為渾合使知歸一嘗以
中庸戒懼慎獨教人曰中庸揭此獨知為後學開一門路

多少緊切譬如種植必有真種子落地然後培植日加暢茂矣於是四方來學者衆乃構心源精舍為講所所著有心源問辨錄及漳平縣志督學姜公寶訪求八閩人物獨推重之祀之鄉賢學者稱廓齋先生

同知陳先生九叙

陳九叙漳平人萬厯甲戌進士累官同知有惠政九叙少學曾汝檀之門嘗言學必成其大不在一節取名高學必成其是不在與人競門戶沈古林王東里耿楚侗

諸先輩咸許可其學以為正脈著有心源錄詩文諸編

閩中理學淵源考卷八十二